

दिनांक 25.12.2025

समय: 18.45 बजे

- पैली रा प्रधानमंत्री अटल बिहारी वाजपेयी री जयंती आज सुशासन दिवस रा रूप मांय मनायी ज्यी-प्रधानमंत्री नरेन्द्र मोदी श्री वाजपेयी ने समर्पित राष्ट्र प्रेरणा स्थल रो उद्घाटन कर्यों
- मुख्यमंत्री भजनलाल शर्मा कह्यो-सरकार नौजवानां ने रोजगार देवण सारू संकल्पित-लारला दो साला मांय निजू हलका मांय दो लाख नौजवानां ने नौकरी मिलीं
- क्रिसमस माथे प्रदेशभर मांय उमाव रो माहौल-गिरजाघरां मांय प्रार्थना सभावां रे साथे खास आयोजन
- सर्दी रे जोर पकड़ण रे साथै ई प्रदेश मांय सैलाणियां री आवक बधीं

000

देश आज पैली रा प्रधानमंत्री अर भारत रत्न अटल बिहारी वाजपेयी ने वां री 101वीं जयंती माथे सिरधा भाव ऊँ याद करें

.....

अटल बिहारी वाजपेयी री जयंती आज देशभर मांय सुशासन दिवस रा रूप मांय मनायी ज्यीं ई मौके व्ह्या न्यारा-न्यारा कार्यक्रम मांय श्री वाजपेयी ने श्रिद्धांजलि दीरीजी अर राष्ट्र विकास मांय वां रा योगदान ने याद करी ज्यां राष्ट्रपति द्रौपदी मुर्मू, उपराष्ट्रपति सी.पी. राधाकृष्णन अर प्रधानमंत्री नरेंद्र मोदी नुवी दिल्ली मांय सदैव अटल माथे वां री समाधि माथे फूल अर्पण कर्यां पछे प्रधानमंत्री लखनऊ मांय श्री वाजपेयी ने समर्पित राष्ट्रप्रेरणा स्थल रो उद्घाटन कर्यों तीस करोड़ रुपये री लागत ऊँ बणायी ज्या अर 65 एकड़ रा मोटा हलका मांय फैल्यो ओ परिसर एक स्थायी राष्ट्रीय संपत्ति रा रूप मांय बणायी ज्यो हैं ई मौके व्ही जनसभा मांय बोलता प्रधानमंत्री कह्यो के सरकारी योजनावां रो 100 फीसदी फायदो पूगावणो वां री सरकार रो मकसद है अर अवै करोड़ो गरीबां ने इण रो फायदो मिल रह्यो हैं

.....

सुशासन दिवस माथे राज्य थर रो जळसो जयपुर मांय व्ह्यो जठे मुख्यमंत्री भजन लाल शर्मा अहलकारा अर कार्मिका ने सुशासन री शपथ दीरायीं ई मौके मुख्यमंत्री कह्यो के प्रधानमंत्री नरेन्द्र मोदी रा 'न्यूनतम सरकार, अधिकतम सुशासन' रा मंत्र ने साकार करण सारू सगळा ने निष्ठा अर समर्पण साथै कोशिश करणी चाहिजें प्रदेशभर मांय ई सुशासन दिवस माथे न्यारा-न्यारा कार्यक्रम व्ह्यां जिला थर रा आयोजनां मांय खास जळसा रो सीधो प्रसारण दिखायी ज्यों जालौर मांय मुख्य सचेतक जोगेश्वर गर्ग अटल बिहारी रा जीवन माथे रोशनी डालता वां रा जीवन ऊँ सीख लेवण री अरज करीं ई मौके जिला पुस्तिका रो विमोचन करी ज्यों बाड़मेर मांय घणी तादाद मांय जन नुमाइन्दा अर प्रशासनिक अहलकार भेळा व्ह्यां आदिवासी बाहुल सलूंबर मांय व्ह्या जळसा मांय जिला कलेक्टर अहलकारां ने लोगां ऊँ जुड़्या मामलां ने प्राथमिकता रे साथे निपटावण री अरज करीं स्वर्ण नगरी जैसलमेर मांय व्ह्या कार्यक्रम मांय जिला कलेक्टर प्रताप सिंह पैली रा प्रधानमंत्री रा चित्रांम माथे पुष्पांजलि अर्पण कर ने सुशासन री शपथ दीरायीं

000

प्रधानमंत्री नरेन्द्र मोदी कह्यो के सांसद खेल महोत्सव री मार्फत देश भर मांय हजारों हुनरमंद खिलाड़ी उभर रिया हैं आज वीडियो कान्फ्रेंस की मार्फत सांसद खेल महोत्सव मांय बोलता श्री मोदी कह्यो के ई आयोजन रो दायरों अर असर दोन्यू ई घणा बध्या हैं वणा कह्यो के आज खेल महोत्सव युवा विकास री मार्फत देश निर्माण रो मजबूत थाम्बो बण रह्यो हैं प्रधानमंत्री कह्यो के ओ खेल आयोजन नौजवानां मांय हार-जीत रे परे खेल भावना रा विकास मांय योगदान देवे हैं वणा कह्यो के लायक अर अनुशासित युवा ई राष्ट्र रा निर्माण मांय योगदान देवे हैं

.....

प्रदेशभर मांय न्यारी-न्यारी ठौड़ा सांसद खेल महोत्सव रा समापन जळसा व्ह्यां कोटा मांय व्ह्या जळसा मांय लोकसभा अध्यक्ष ओम बिरला वर्चुअल भेळा व्ह्यां

.....

कोटपूतली-बहरोड़ मांय केन्द्रीय मंत्री भूपेन्द्र यादव भेळा व्हे र नौजवानां रो हौसलो बधायों झुंझुनूं मांय राख्थी ज्या जळसा मांय जन नुमाइन्दा रे साथै विधायक राजेन्द्र भांभू मौजूद रियां चित्तौड़गढ़ मांय राख्थी ज्या जळसा मांय पैली रा नामी क्रिकेट खिलाड़ी कपिल देव ई शिरकत कर ने खिलाड़ियां रो उमाव बधायों

000

मुख्यमंत्री भजनलाल शर्मा कह्यो के की वां री सरकार नौजवानां ने रोजगार ऊँ जोड़ण सारू दृढ़ संकल्प लियो है अर ई हलकां मांय डबल इंजन सरकार कानी ऊँ बरोबर कोशिश करी जावें मुख्यमंत्री आज जयपुर रा कॉमर्स कॉलेज मांय व्ह्या राज्य थर रा रुजगार महोत्सव मांय बोल रह्या हां ई मौके वणा कह्यो के लारला दो सालां रे दौरान नौजवानां रा विकास रा बारा मांय फैसला अर योजनावां रे चालता सरकारी हलकां रे साथे निजू हलका मांय ई दो लाख ऊँ बत्ती रुजगार मिल्या हैं

000

ई मौके मुख्यमंत्री न्यारी-न्यारी कंपनियां मांय चुणी ज्या नौजवानां ने नियुक्ति पाना शुभकामनावां दीं वणा कार्यक्रम थळा माथे लगायी ज्यी कंपनियां री स्टॉलां ने देख्यां कार्यक्रम मांय उपमुख्यमंत्री दीया कुमारी अर विधायक राज्यवर्द्धन राठौड़ ई भेळा व्ह्यां

000

राज्यपाल अर कुलाधिपति हरिभाऊ बागड़े कह्यो है के पढेसरां रो सनद लेवणो ई लगस नी व्हेणो चाहिजे, इण रे साथै ई वां मांय बौद्धिक बूता नैतिक मूल्यां अर देश रे प्रति दायित्व भाव रो विकास ई उतरो ई जरूरी हैं राज्यपाल आज अजमेर रा महर्षि दयानंद सरस्वती विश्वविद्यालय रा दीक्षांत जळसा मांय बोल रह्या हां ई मौके श्री बागड़े श्री बागड़े न्यारा-न्यारा संकायां रा 54 शोधार्थियां ने पीएचडी री सनद ई सूंपी अर ठावां शैक्षणिक प्रदर्शन करण वाळा पढेसरां ने कुलाधिपति तमगा अर सब ऊँ बत्ती नम्बर लावण वाळा पढेसरां रा सोना रा तमगा ई दियां ई मौके विधानसभा अध्यक्ष वासुदेव देवनानी अर जल संसाधन मंत्री सुरेश सिंह रावत समेत शिक्षक विश्वविद्यालय कार्मिक अर पढेसर मौजूद रियां

000

अजमेर रा सूफी संत ख्वाजा मुईनुद्दीन हसन चिश्ती रो सालाना उर्स परवान माथे हैं दरगाह ज़ियारत सारू देश रा न्यारा-न्यारा हलकां ऊँ अकीदतमंदां रे पूगण रो सिलसिलो चालें हमारी खबरनवीस बतायो के आज राज्यपाल कानी ऊँ ख्वाजा साहब री मज़ार माथे चादर पेश करी ज्यीं

000

प्रभु यीशू रो जन्मदिन आज क्रिसमस रा रूप मांय मनायो जावें ई मौके गिरजाघरां मांय खास प्रार्थना सभावां व्ही अर ईसा मसीह रा उपदेश पढ़ र सुणायी ज्यां जयपुर, अजमेर, सवाईमाधोपुर समेत प्रदेश रा न्यारा-न्यारा ज़िलां मांय क्रिसमस रे मौके ईसाई समुदाय रा लोगां मांय खास उमाव निजर आयों प्रभु यीशू रा जन्म री झांकियां देखण घणी तादाद मांय ईसाई लोग गिरजाघर पूग्या है अर कैरल्स गा र खुशियां मनावें राजधानी जयपुर रा होटलां, रेस्टोरेंट अर शॉपिंग मॉल मांय क्रिसमस ने ले र खास आयोजन राख्थी ज्या हैं सांता क्लॉज री पोशाक मांय टावरां ने निजराना बाटी ज्या अर रंग-बिरंगी झालरां रे साथे क्रिसमस ट्री सजा र खुशियां साझा करी ज्यीं म्हारां पाली खबरनवीस बतायो के जवाई बंधा हलका मांय आया विदेशी सैलाणी ई क्रिसमस रा उमाव मांय भेळा व्हेता दिख्यां

000

आधूणी विक्षोभ रा असर रे खत्म होवण रे साथे री प्रदेशभर मांय सर्दी रो असर बध ग्यो हैं उत्तर ऊँ चालण वाळी ठण्डी हवा मैदानी हलकां मांय ठण्ड ने तेज़ कर दिया हैं शेखावटी हलका रा ज़िला मांय संवारा कोहरा रे साथे ठण्डी हवा चालण ऊँ लोगां रा जीवन माथे असर पड़यों हैं मौसम महकमां मुजब ई सीजन मांय सीकर मांय दूजी बार कमती रो तापमान एक डिग्री सेल्सियस मापी ज्यो अलवर ज़िला मांय ई करड़ी ठण्ड रे चालता आम जिन्दगी माथे असर व्ह्यो हैं खेतां मांय फसलां माथे बर्फ जमण रे साथे सूखी घास अर लकड़ी माथे ओस निजर आयीं मौसम केन्द्र जयपुर आवता दो दिन चूरू, झुंझुनूं, सीकर अर नागौर जिलां मांय शीतलहर चालण सारू चेताया हैं अठिने सर्दी री छुट्टियां लागण रे साथे ई प्रदेश रा अभ्यारण्य ई सैलाणियां ऊँ गुलजार होवण लाग्या हैं अलवर रा सरिस्का मांय बाघा रो कुनबों बधण रे सैलाणियां री आवक बध ग्यी हैं प्रदेश री पर्वतीय सैलाणी ठौड़ माउंट आबू मांय सैलाणियां री आवक बध ग्यी हैं म्हारा सिरोही खबरनवीस बतायो के अठे ठंड रो आनन्द लेवण आरे-सारे रा राज्या रे साथे ई सैलाणी पूग रह्या हैं

000